


A photograph of athlete Andre Anura Anuar in mid-air during a long jump. He is wearing a dark blue singlet with yellow accents and a bib number 'L277'. The track is red with white lane markings. In the background, there are spectators and other athletes.

Aksi Andre dalam acara lompat kijang, semalam.

SUKIPT 2022

Andre hadiah tiga emas buat UPM

Kuala Lumpur: Tiga pingat emas diraih Andre Anura Anuar pada temasya Sukan Institusi Pengajian Tinggi (SUKIPT) 2022 'dihadiahkan' atlet olahraga itu kepada Universiti Putra Malaysia (UPM).

Andre yang berusia 21 tahun berkata, kilauan emas itu adalah sebagai tanda terima kasih kepada UPM yang banyak membantu dalam membina karier sukannya.

Semalam, atlet yang membuat penampilan di Sukan Komanwel Birmingham 2022 itu memenangi emas ketiganya dalam acara lompat kijang dengan melakukan lompatan sejauh 14.99 meter (m).

Pingat perak menjadi milik atlet Universiti Pendidikan Sultan Idris (UPSI), Muhammad Sunik Muslimin dengan lompatan sejauh 14.51m, manakala rakan universiti Andre, Muhammad Nafeez Akmal melengkapkan podium di tempat ketiga (14.50m).

Kilauan emas itu adalah pingat 'tambahan' dijelmakan Andre selepas meraih dua emas

dalam acara 4x100m lelaki dan lompat jauh lelaki sebelum ini.

Andre berpuas hati

Merumuskan pencapaiannya di SUKIPT kali ini, Andre berkata, dia berpuas hati dengan prestasinya, walaupun terpaksa mengharungi musim yang padat.

"Saya gembira dapat menyumbang tiga emas dalam penampilan pertama saya di SUKIPT.

"Kalau ikutkan UPM sasarkan dua emas saja pada saya, tapi saya dapat bonus satu emas.

"Sebenarnya saya masih banyak lakukan kesilapan dan lompatan kedua saya turut batal dan itu yang perlu saya tambah baik lagi pada masa akan datang.

"Bagaimanapun, saya tetap berpuas hati juga dengan persembahan walaupun penat sebab minggu ini jadual agak padat dengan latihan. Emas yang saya berjaya capai ini adalah hadiah dan tanda terima kasih buat UPM kerana banyak membantu dalam karier sukan saya ketika ini," katanya.